



Sesida dals

Communitgà ils

Protocol nr.

16 da december 2025

17 da december 2025

920/2025

Incumbensa Horrer

concernent l'auzament dals supplements per uffants

Resposta da la Regenza

La Lescha federala davart ils supplements da famiglia ed ils agids finansials ad organisaziuns da famiglias (LSFam; CS 836.2) e l'Ordinaziun davart ils supplements da famiglia (OSFam; CS 836.21) defineschan tranter auter las cundiziuns generalas per l'autezza dals supplements da famiglia (supplements per uffants e supplements da scolaziun), il dretg da survegnir supplements da famiglia e la finanziaziun da las prestaziuns, la realisaziun sco er las cumpetenzas dals chantuns. En il chantun Grischun reglan la Lescha davart ils supplements da famiglia (LSF; DG 548.100) sco er las Disposiziuns executivas tar la Lescha davart ils supplements da famiglia (DERtLSF; DG 548.120) la realisaziun dal dretg federal da basa. En quest connex cumpiglian las disposiziuns chantunalas mo las persunas che han in'activitad da gudogn en ina professiun betg agricola e las persunas senza activitad da gudogn. Tenor las prescripziuns federalas importa il supplement per uffants resp. il supplement da scolaziun almain 215 resp. 268 francs per mais (art. 5 al. 1 ed al. 2 LSFam). Ils chantuns pon prevair supplements pli auts. En l'art. 1 al. 1 lit. a e b DERtLSF ha la Regenza fixà las tariffas minimalas dals supplements per uffants resp. dals supplements da scolaziun. A partir dal 1. da schaner 2026 importan questas tariffas minimalas 240 resp. 290 francs per mais. Cun questa revisiun auza il chantun las tariffas minimalas per ils supplements da famiglia per la segunda giada dapi l'onn 2023 per mintgamai 10 francs. La finamira da la Regenza èsi stà da rinforzar l'attractivitat dal Grischun sco lieu d'abitar per famiglias ed a medem temp da distgargiar las interpresas che fan giu quint cun la Cassa da cumpensaziun chantunala per famiglias. Las persunas cun activitad da gudogn en l'agricultura han il dretg da survegnir supplements da famiglia tenor la Lescha federala davart ils supplements da famiglia en l'agricultura (LSFamA; CS 836.1). Quests supplements da famiglia correspundan a las tariffas tenor l'art. 5 LSFam, q.v.d. 215 resp. 268 francs per mais. En il territori da muntogna datti in augment da mintgamai 20 francs. Plinavant vegn pajà in supplement da chasada da 100 francs.

Cumpetentas per exequir ils supplements da famiglia per persunas cun activitad da gudogn ordaifer l'agricultura èn las cassas da cumpensaziun per famiglias privatas che vegnan renconuschidas dals chantuns, las cassas da cumpensaziun per famiglias che vegnan manadas da las cassas da cumpensaziun da la AVS sco er la Cassa da cumpensaziun chantunala per famiglias. Questa ultima è er cumpetenta per ils supplements per persunas senza activitad da gudogn. Ils supplements da famiglia en l'agricultura vegnan exequidas da la Cassa da cumpensaziun chantunala.

Ils supplements da famiglia per lavurantas e lavurants sco er per persunas cun activitad da gudogn independenta en il chantun Grischun vegnan finanziads sur contribuziuns da salari dals patruns e da las persunas associadas cun activitad da gudogn independenta. Dapi l'onn 2023 ha la Regenza sbassà duas giadas las tariffas da contribuziun respectivas, quai per 0,1 resp. 0,05 puncts procentuals. A partir dal 1. da schaner 2026 importan ellas 1,50 pertschient da las entradas suttamessas a la AVS (art. 13 al. 1 e 2 DERTLSF). Tenor l'art. 16 al. 2 LSFam vegnan las contribuziuns dals patruns «calculadas en pertschients da las entradas ch'èn suttamessas a la AVS», uschia ch'ina finanziaziun sur las finanzas publicas generalas n'è betg pussaivla. Tut ils chantuns finanzieschan ils supplements da famiglia per persunas che han in'activitad da gudogn en ina professiun betg agricola exclusivamain sur contribuziuns dals patruns, cun excepziun dal chantun Vallais. Là sa participeschan las lavurantas ed ils lavurants a la finanziaziun. Ils supplements per persunas senza activitad da gudogn vegnan finanziads mo dal chantun, tals en l'agricultura per in terz dal chantun, nun che las contribuziuns dals patruns cuvrian ils custs. En l'agricultura po il chantun pagar ulteriurs supplements – la finanziaziun regla el en quest connex en moda autonoma.

Per la Cassa da cumpensaziun chantunala per famiglias chaschunass in augment dals supplements per uffants da 240 francs sin 325 francs per mais custs supplementars da circa 24,4 milliuns francs, ed in augment dals supplements da scolaziun da 290 francs sin 475 francs per mais custs supplementars da circa 18,7 milliuns francs (total: 43,1 milliuns francs). Per las cassas da cumpensaziun privatas e per las cassas da cumpensaziun da la AVS chaschunass l'auzament tenor l'incumbensa custs supplementars da circa 7,3 milliuns francs resp. 5,6 milliuns francs (total: 12,9 milliuns francs). Partind d'in quint da gestiun equilibrà da la Cassa da cumpensaziun chantunala per famiglias – q.v.d. sche las expensas annualas per las prestaziuns correspundan als retgavs annuals or da las contribuziuns – stuess la tariffa da contribuziun actuala per patruns e per persunas cun activitad da gudogn independenta vegnir auzada dad 1,50 sin 2,30 pertschient da las entradas suttamessas a la AVS. Per las persunas senza activitad da gudogn stuess il chantun finanzia supplementar-main circa 0,5 milliuns francs per onn. En l'agricultura è sa tschentada la dumonda, co ch'ils ulteriurs supplements vegnissan finanziads.

Ord vista da la Regenza n'èsi betg commensurà, d'auzar las contribuziuns dals patruns e da las persunas cun activitad da gudogn independenta en questa dimensiun u da prevair ina nova finanziaziun sur contribuziuns da las lavurantas e dals lavurants. Tenor l'art. 16 al. 2 LSFam n'è ina finanziaziun sur meds da las finanzas publicas generalas betg pussaivla.

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Marcus Caduff

Il chancelier:

Daniel Spadin